

TATITRY NY FILANKEVITRY NY MINISITRA NATAO TAO AMIN'NY LAPAM-PANJAKANA

IAVOLOHA

- ALAROBIA 06 JANOARY 2021 -

• I- FAMPAHAFANTARANA

TAONAN'NY ASA NY TAONA 2021 :

« Ny asa no porofom-pitiavana hoy ny Filoha nandritra ny Filankevitry ny Minisitry voalohany natao androany tao amin'ny lapam-panjakana Iavoloha. Tsy manana fotoana laniana be intsony isika amin'ny fivoriana sy ny adi- hevitra, fa fotoanan'ny asa izao ary miandrindra vokatra avy aty aminareo Minisitry sy ny Governemanta ny Vahoaka Malagasy. Koa mila antsika miasa, haingana kokoa, tsara kokoa ary betsaka kokoa ankehitriny. Asa ahitam-

bokatra mivaingana ary mitondra any amin'ny fampandrosoana sy ny fivoarana eto amin'ny firenena.» Ireo no hafatra nentin'ny Filoham-pirenena nametrahana ny sorid-alana ho amin'ity taona vaovao ity. Nohamafisiny ny tokony hanombohana sy hanafainganana ireo tetikasa toy ny lalana, tramway, ny angovo azo avy amin'ny rivotra, ny masoandro ary ny rano, ny fanomezana sy fampitomboana ny rano fisotro madio na an-tanan-dehibe na ambanivohitra. Tsy maintsy atomboka amin'ity volana janoary ity dingana rehetra mikasika ny Tanamasoandro ka hisy ny brigade manokana hikorakara ranoray ny fanatanterahana io tetikasa io tsy maintsy hajoro eo anivon'ny ministera roa dia ny misahana ny asa vaventy sy ny misahana ny fananganana ny tanàna vaovao.

Ny 19 janoary 2021 no hanolotra ho fantatry ny rehetra na ny mpamatsy vola, na ireo mpampiasa vola na ireo sehatra rehetra hiaraka hanatanteraka ny asa ny Plan Emergence Madagascar na ny PEM.

VOLAMENA 73,7 kg : NITORY NY FANJAKANA MALAGASY, TSY MAINTSY HAVERINA ETO AN-TANINDRAZANA NY ENTANA SY IREO MPANAO HOSOKA :

Nitory ny fitondram-panjakana tamin'ny fanondranana an-tsokosoko ilay volamena milanja 73,7kg nakany ivelany.

Tsy maintsy atao ny fomba rehetra hamerenana io volamena io ao amin'ny banky foibe eto Madagasikara. Ary hiroso tsy ho ela ny fitsarana ity raharaha ity eny anivon'ny PAC na ny Pôle Anti-Corruption.

Hohenjehina ary hiharan'ny sazy ireo rehetra izay mikasa ny hanelanelana na hisakantsakana amin'ny fanatanterarahana izany fampodiana azy ireo izany eto an-tanindrazana.

Tsy maintsy hampiharina ny lalàna. Hijoro tsy ho ela ny « agence de recouvrement des avoirs illicites » araka ny efa voafaritra ao anaty didy hitsivolana mikasika izany. Hisy ny fifandraisana sy fiaraha-miasa amin'ny lafiny rehetra amin'ny fitondrana Afrikana Tatsimo. Marihana fa niato nanomboka ny volana oktobra 2020 ny fanodranana volamena sy vatosoa.

RIVODOZA : NORAISIN'NY KFW NY FANDOAVANA NY SARAM-PIANTOHANA NY VOKATRY NY RIVODOZA AMIN'NY TAONA 2020-2021:

Nampahafantarina ny Minisitry ny toe-karena sy ny fitantanam-bola nandritra ny Filankevitry ny Minisitry ny faneken'ny KFW, izay mpamatsy vola avy amin'ny Governemanta alemana, ny fandraisana an-tanana ny saram-piantohana mitentina 2 tapitrisa dolara tsy maintsy aloa amin'ny ARC mba hiantohana izay mety ho vokatry ny rivodoza 2020-2021.

OTIV BOENY : TSY MAINTSY HAVERINA NY AMPAHANY AMIN'NY VOLAN'IREO MPIKAMBANA :

Ny fanjakana amin'ny alalan'ny Paositra Malagasy no hanampy amin'ny famerenana amin'ny ampahany ny tahirim-bola napetrak'ireo mpikambana voafitaka tao anatin'ny fampindramam-bola madinika OTIV BOENY. Tsy maintsy mamerina ny vola nahodiny ireo rehetra mpitantana sy mpiasa voarohirohy tamin'izany ary hotohizana ny fanenjehana azy ireo araka izay voafaritry ny lalàna.

• II- FANDANIANA VOLAVOLAN-DALANA SY DIDIM-PANJAKANA

Araka ny tolo-kevitra ny Minisitry ny Fiarovam-pirenena :

- Noraisina ny didim-panjakana mametraka ny vondron-tafika mpilatsaka an'elonaina na ny "Premier Bataillon Parachutiste" sy ny didim-panjakana mametraka ny vondron-tafika andiany faharoa amin'ny « Infanterie de Marine »

Araka ny tolo-kevitra ny Minisitry ny Toe-karena sy ny Fitantanam-bola :

- Noraisina ny didim-panjakana manova ny didim-panjakana laharana faha 2019-1125 nanova sy nanendry ny mpikambana vaovao ao amin'ny filakevim-pitondran'ny « Autorité de Régulation des Marchés Publics ».

• III- FANENDRENA

Ny Filankevitry ny Minisitry dia nankatoa ny fanendrena ireto mpiasampanjakana ambony ireto :

Araka ny tolo-kevitra ny Minisitry ny fiarovam-pirenena :

- Général de Brigade RAFIDIMANANA Teddy Francis, dia voatendry ho Tale Jeneralin'ny « Office des Transmissions Militaires de l'Etat. » izay eo ambany fahian'ny Fiadidiana ny Repoblika.

Araka ny tolo-kevitra ny Minisitry ny Fitsarana :

- Ramatoa RAZAFIARIVONY Berthine, dia voatendry ho lehiben'ny Fampanoavana eo anivon'ny Fitsarana ambony eto Antananarivo.